

Tge fa l'aura?

Il diavel en ils nivels

DA GUIU SOBIELA-CAANITZ

■ Co atgnamain sa sviluppa il clima da noss planet? Quai ans dumanda insa puspè en vista d'ina stad che na corrisponda tuttina betg a la media. Quai occupa er experts, tant pli che lez svilup sto influenzar nossa moda da viver. «Newsweek», magazin emnil edì a New York e stampà a Winterthur, deditgescha las pp. 45-46 das numer dals 12 da fanadur a preschentat il stadi actual da las perscrutaziuns climatologicas. Quatter auturs declaran a moda clera e chapibla quai che constat e quai ch'ins sto anc scleir.

Quant fitg vegni pli chaud?

Insatge na pon ins pli snegar: «Il clima vegn adina pli instabel, cun dapli stemprads crivs e musters variabels da precipitaziuns». Plinavant: «Ins n'astga betg pli resguardar las temperaturas stitgas da la stad 2003 sco extraordinaris. La situaziun da 2002 e 2003 en l'Europa, cun l'emprim ina stad ordvar plievgiusa ed inundaziuns da record, lura la stad la pli chauda dapi seculs, vegn a caracterisar l'aura dal futur (...). Ma ils sciensiads provan pir da responder a la gronda dumonda: Quant fitg vegni pli chaud en noss tschientaner? I dat uschè blers facturs nunenconuschents ch'ins na po dir sch'i saja exagerà d'avalar da catastrofas, ubain sch'i vegnian disgrazias anc pli snuaiylas che quellas che nus spettgavan.» Ma tge na savainsa (anc) betg? L'aura ed il clima dependan d'uschè blers elements che pliras previsiuns dals onns novanta n'hant betg sa verifitgadas. Ina dumonda centrala pertutga il destin da quel charbun che nus arda e che va lura en l'aria. Tge succeda en l'atmosfera cun lezzas particlas da pulvra e fulin? La resposta è zupenda en ils nivels. Co sa furman els? Co sa spartan els? Tge succeda en il fratemps?

Pli paucas plievgias da monsun

«La vapur sa transfurma en daguttins che furman nivels e viceversa, mantuond e producind chalur da cuntin». Il climatolog Andrew Heymsfield lavura en ils Stadis unids, per il Center naziunal da perscrutaziun atmosferica. «Ina stad ha'l passentà sglund (...) pli pauc che 50 m sur l'Ocean ind e mesirond la quantitat da vapur d'aua che leva da la surfatscha, sco era la polluziun da l'aria che vegn dal continent ind. Lura sgulava'l enfin ad in'autezza da 15 – 20 km, nua che nivels d'urizi fineschan en sdrimas finas; là bittava'l giuador sondas per far provas da con-

trolla sin particlas da glatsch (...). El ha chattà or ch'il fim dals camins e sbufs da l'India dal sid transfurman ils nivels che sa furman sur l'Ocean ind e che quai pudess influenzar l'aura a moda snuaiva. Particlas da fulin chatschadas sur l'ocean attiran la vapur d'aua, uschè ch'i sa furma dapli nivels. La curvia da nivels, vegnida pli vasta, reflectescha ensi la glisch dal sulegl, sfradond l'intschess [terrester] pertutgà (...). Quels nivels che derivan dal fulin cuntegnan daguttins pli pitischens ch'ils nivels normals; i na sun uschè abels da manar plievgias da monsun. Ina curvia pli vasta da nivels

e pli paucas plievgias han già donnegià l'agricultura inda (...). Ins da dumonda plinavant co ch'ils nivels reageschan al stgaudament da l'atmosfera. L'aria pli chauda sa absorbar dapli vapur d'aua; questa rinforza l'effect da serra dapli ch'il dioxid carbonic (CO₂).» Ils auturs concludan: «Ils sciensiads sa fidan da schoglier ina giada il problem dals nivels, ma 'quai pudess pretender set onns', pia anc set onns cun bagliaffarias politicas ('political hot air', pled per pled 'aria chauda politica') e paucas ovrás». Dalonder il titel da l'artigel: «The Devil Is in the Clouds» («Il diavel sa chatta en ils nivels»).



L'aura resta in tema central en nossa vita.

KEYSTONE